

涇陽縣卷之七

劉璜



王濶

邑令王際有纂修

邑庠生劉良股全校

師繼曾

牛光襄

人物志

人材何代無之夫生其地而懿行弗彰固有司之責也彼載在國史名位俱顯尚已然或抱曲學而所至涇陽縣志卷之七

有聲或負潛德而終身氓沒亦何可勝數聖門論人舉其所長畧其所短志之微意存焉涇陽先王之地也漢唐迄今其間名臣巨卿生爲國禎死而祀於其社猗歟盛矣而肥遯之士高風恒不可及至里閭中孝義節烈冥然與日月爭光則雖賤必錄若夫技藝亦號博通仙釋取資方外縱滄桑屢易而挹清芬者得與山川不改語云人不愛和磬僅弓而愛高曾之規矩以古之涇變今之涇非其子弟卽其曾元有不爭自濯磨使後之人咨嗟俯仰以不媿茲土者乎且



令人知太上立德一介之夫箕帚之婦皆得與薦紳  
碩彥爭名業而同不朽也作人物志第七

宦業

漢

宣秉字巨公少修高節顯名三輔哀平間見王氏據  
權侵削宗室有逆萌遂隱遯深山州郡連召常寢疾  
不仕王莽爲宰衡辟之不應及莽篡位又遣使徵之  
秉固稱疾更始卽位徵爲侍中建武元年拜御史中  
丞光武特詔御史中丞與司隸校尉尙書令會同並

涇陽縣志

卷之七

二

專席而坐故京師號曰三獨坐明年遷司隸校尉務  
舉大綱簡畧苛細百僚敬之性節約常服布被蔬食  
瓦噐帝嘗幸其府舍見而嘆曰楚國二龔不如雲陽  
宣巨公卽賜布帛帳帷什物四年拜大司徒司直所  
得祿輒以收養親族其孤弱者分田與之自無儋石  
之儲六年卒於官帝愍惜之除子彪爲郎祀鄉賢  
王隆當西漢末避難河西爲實憲左護軍建武中爲  
新汲令所著有賦銘書

董恭成帝朝爲御史雲中侯哀帝朝徵爲霸陵令遷



光祿大夫尋爲少府賜爵關內侯復徙衛尉赫然貴  
盛於關中以子董賢敗卒沒其家

第五倫字伯魚少有義行遭赤眉銅馬之亂宗黨多  
賴以保全郡尹鮮於褒奇之署爲吏褒去爲鄉嗇夫  
已乃棄去客河東久之京兆尹閻興召爲主簿復署  
爲督鑄錢掾領長安市倫平銓衡正斗斛市無阿枉  
百姓悅服每讀光武詔書嘆曰此聖主也一見決矣  
尋舉孝廉帝見而異之與語倫酬對政道帝大悅拜  
會稽太守倫躬自斬菟飼馬妻執爨所得祿皆賤買

涇陽縣志

卷之七

三

與貧民會稽俗信神常以牛祭民間爲之困匱倫案  
論之竟息已而坐法免尋復拜宕渠令遷蜀郡太守  
乃罷掾史之富者更選孤貧有志行者處之職務修  
舉肅宗立擢爲司空數有諫論倫雖峭直然嘗疾俗  
吏苛刻及爲三公值帝長者有善政因勸成之奉公  
盡節言事無所依違屢疏辭疾賜策罷以二千石俸  
終其身加賜錢五十萬公宅一區年八十餘卒祀鄉

賢

有傳見  
藝文

第五頡倫少子歷桂陽廬江南陽太守所在見稱順



帝之爲太子廢也頡爲大中大夫與太僕來歷等共守闕固爭帝卽位擢爲將作大匠卒於官

第五訪字仲謀司空倫之族孫也少孤貧常傭耕以養兄嫂閒暇則以學文仕郡爲功曹察孝廉補新都令政平化行三年之間鄰縣歸之戶口十倍遷張掖太守歲饑粟石數千訪乃開倉賑給吏懼遣爭欲上言訪曰若上須報是棄民也太守樂以一身救百姓遂出穀賦人順帝璽書嘉之由是一郡得全歲餘官民並豐界無姦盜遷南陽太守去官拜護羌校尉邊

涇陽縣志

卷之七

四

境服其威信卒於官

第五種字興先倫曾孫爲吏名魁州郡永壽中詔使冀州廉察災害所論刑免刺史二千石以下甚衆棄官奔走者數十人以奉使稱職拜高密侯相高密在徐兗二州間二州盜起種儲糧厲士以待賊聞而憚之流民歸者歲數千家以能調衛相遷兗州刺史時中常侍單超兄子匡爲濟陰太守負勢貪橫種委從事衛羽案捕發其贓數十萬劾之並以劾超太山賊叔孫無忌等大爲暴州郡不能討種遣羽論降之後



單超以事陷種坐徙朔方超外孫董援爲朔方守蓄怒以待有種初爲衛相所善遇門下掾孫斌者具知超謀於是將俠客追及之遮殺送吏竟脫種數年徐州從事臧旻上書爲種訟寃會赦出

有傳見藝文

### 三國

夏侯淵夏侯村人村有淵墓或云本漢夏侯勝墓然不可攷因未載其行事

### 南宋

吉翰字仲文初爲龍驤將軍趙道隣幕軍隨征廣固涇陽縣志

卷之七

五

賜爵建城縣侯爲將佐清謹勤正甚爲宋武帝所知賞元嘉中歷梁南秦二州刺史徙益州刺史加都督在任著美績論者稱之累遷徐州刺史兼徐兗二州豫州梁郡諸軍事時有死罪囚典籤意欲活之翰謂曰此囚罪重卿欲加恩便當代任其罪因命左右收典籤付獄殺之而原其囚郡下畏服莫敢犯禁卒於

### 官

### 隋

李圓通少孤賤是時隋文帝父爲後周隋國公圓通



給事其家及文帝襲隋國公擢授叅軍事以敢爲見  
重文帝作相賜封懷昌男火之授帥都督進爵新安  
子委以心膂圓通戮力勁捷長於武用周氏諸王素  
忌文帝每備隙欲圖之數賴圓通保護以免文帝深  
感之由是參預政事授相國外兵曹仍領左親信尋  
授上儀同文帝受周禪拜內史侍郎領左衛長史進  
爵爲伯歷左右庶子給事黃門侍郎尙書左丞攝刑  
部尙書深被任信後以左丞領右翊衛驃騎將軍開  
皇間伐陳圓通以行軍總管從楊素出信州道以功

進位大將軍進封萬安縣侯揚州總管長史尋轉并  
州總管長史入爲司農卿治粟內史遷刑部尙書後  
數歲復爲并州長史秦孝王以奢侈得罪圓通亦坐  
免官尋檢校刑部尙書事仁壽中以勳進封郡公煬  
帝嗣位拜兵部尙書帝幸揚州以圓通留守京師判  
宇文述田以還民述訴其受賂帝怒免官卒子孝常  
大業末爲華陰令

趙元淑北朝周末隋初時人父曰世模幼事高寶寧  
後以衆歸周授上開府寓居京兆之雲陽隋文帝受



周禪也世模恒典宿衛後從晉王伐陳力戰而殉朝  
廷以其死事故乃以其子元淑襲父官元淑性疎淡  
不治產業家徒壁立後數歲授驃騎將軍將之官無  
以自給時長安富人宗連家累千金仕周爲三原令  
獨奇元淑以季女妻之諸所資給元淑者甚備元淑  
遂爲富人及煬帝嗣位漢王諒作亂元淑從楊素擊  
平之以功進位柱國拜德州刺史尋轉潁川太守並  
有威惠因入朝會司農不時納諸郡租穀元淑上言  
帝謂元淑曰如卿意者幾日當了元淑曰如臣意不  
涇陽縣志

卷之七

七

過十日帝卽日拜元淑爲司農卿納天下租如言而  
了帝悅焉尋領將軍典宿衛加授光祿大夫封葛公  
楊玄感潛有異志以元淑可與共事乃與結交及玄  
感敗遂罹於法

唐

劉弘基初在隋以廕補隋右勳侍大業末罪廢因亡  
命至太原陰事高祖又察太宗資度非常益自託高  
祖舉事弘基募士得二千人從攻下西河宋老生敗  
追斬其首拜右光祿大夫下馮翊爲渭北道大使西



狗拱風南度滑次長安故城敗隋將衛文昇時諸軍  
尙未至弘基最先勝高祖悅賜馬二十匹京師平功  
第一授右驍衛大將軍討薛舉戰淺水原八總管軍  
皆沒惟弘基一軍戟力矢盡爲賊拘帝以臨難不屈  
優護其家仁杲平乃克歸官之如初劉武周犯太原  
弘基復擒賊俄自脫歸授左一總管從秦王屯柏壁  
以勁卒二千躡賊歸路及宋金剛遁走率騎尾之介  
休與王合戰大破之累封任國公從擊劉黑闥還除  
并鉞將軍會突厥患邊督步騎萬人備塞自幽北東  
涇陽縣志

卷之七

八

拒于午嶺西抵臨涇築障遮寇貞觀間卒陪葬昭陵  
謚曰襄始弘基病給諸子奴婢各五十人田五頃謂  
所親曰使貧固不藉多財卽不賢守此可以脫機疎  
餘悉散之親黨子仁實襲封

李大亮祖瑛爲魏度支尙書大亮有文武才畧臨末  
會陷李密軍中密將張弼異而釋之高祖入關大亮  
以身歸授土門令方歲饑多盜亮拊民墾田歲乃大  
熟以擊盜盜平頃之賊大至亮度不能拒乃舉騎詣  
營說豪帥爲分別禍福賊遂降帝聞之悅擢金州總



管府司馬時楊弘烈據襄陽詔大亮安撫樊鄧因圖  
之擊下十餘城遷安州刺史復使徇廣州會輔公祏  
反以計擒其將擊走之遷越州都督貞觀初徙交州  
召授大府卿復出涼州都督有臺使諷亮獻名鷹亮  
密奏之太宗報之書賜金餅及荷悅漢紀已又詔亮  
爲北道安撫大使以綏賑諸羸亮諫止後與李靖出  
討吐谷渾大破之進爵爲公拜右衛將軍晉王爲皇  
太子詔亮兼右衛率又兼工部尚書帝幸洛陽詔副  
房玄齡居守玄齡稱有王陵周勃節以疾卒帝爲之  
涇陽縣志

卷之七

九

勸謚曰懿陪葬昭陵亮性忠謹外若不能言而內剛  
烈不可干非其義對天子爭是非無回撓至妻子未  
始見惰容事兄嫂以禮聞位通顯居陋狹甚初破公  
祏以功賜奴婢百口謂曰而曹皆衣冠子女不幸破  
亡吾何忍錄而爲隸乎縱遣之破吐谷渾復賜奴婢  
百五十日悉以遺親戚葬宗族無後者三十餘極嘗  
思有以報張弼弼匿亮求之不能得一日識諸塗持  
粥泣悉推家財與之弼拒不受亮言於帝曰臣及事  
陛下匠作丞張弼力也願悉臣官爵授之帝爲遷弼



中郎將代州都督亮卒祀鄉賢

龐玉初事隋爲監門直閣會李密反據洛口玉以關中銳兵屬王世充擊之百戰不衄世充歸東都秦王東徇洛玉率萬騎以降唐高祖以隋舊臣禮之玉魁梧有力明軍法久宿衛習知朝廷制度帝顧諸將多不閑儀檢故授玉領軍武衛二大將軍使衆觀以爲模矍出爲梁州總管巴山獠叛玉裒其首餘黨遂潰徙越州都督召爲監門大將軍太宗以耆厚令主東宮兵雖老不怠小大之務無不親卒帝爲廢朝贈幽

涇陽縣志

卷之七

十

州都督工部尙書

羅藝字子廷襄陽人家於京兆之雲陽父榮隋監門將軍藝大業中以戰力補虎賁郎將隋之伐遼東也李景以武衛大將軍督饜北平詔藝以兵屬之分部嚴一然任氣嘗侮慢景頗爲景辱天下盜起涿郡號富饒伐遼兵仗多在而倉庫盈羨又臨朔宮多珍寶屯師且數萬苦盜賊侵掠畱守將趙什任賀蘭誼晉文衍等不能支藝捍寇數破郤之勇常冠軍爲諸將忌畏藝因以計據涿郡改郡曰營州自稱幽州總管



宇文化及至山東遣使招藝藝曰我隋舊臣今大行顛覆義不受辱於賊斬使者爲煬帝發喪三日時竇建德高開道亦遣使於藝藝謂官屬曰建德等皆劇賊不足共功名唐公起兵據關中民望所係王業必成吾決歸之敢異議者戮會張道源撫輯山東亦論藝降武德二年乃奏表以歸詔封燕王賜姓豫屬籍數與建德戰多所禽馘秦王擊劉黑闥高祖詔藝弟監門將軍壽以兵從藝自率衆數萬破劉什善張君立於徐河黑闥引突厥入寇藝復以兵與皇太子建

威會洛州遂請朝帝厚禮之拜左翊衛大將軍藝負其功且貴重不少屈秦王左右嘗至其營藝疾辱之高祖怒以屬吏久乃釋時突厥放橫憚藝威名詔以本官領天節軍將鎮涇州太宗卽位進開府儀同三司藝內懼乃圖反爲左右所殺

李靖字藥師靖川有故居在焉其墓亦在孟店爲雲陽人無疑而唐書列傳誤爲三原人靖當隋末通書史有壯志其舅韓擒虎每與論兵輒嘆竒之仕隋爲殿內直吏部尙書牛弘見之曰王佐才也大業末爲



馬邑丞高祖擊突厥靖察有異志自囚上急變傳送  
江都至長安道梗高祖已定京師收用之從平王世  
充以功授開府肅銳據江陵詔靖安輯會開州蠻冉  
肇則寇夔州卽擊斬之囚陳圖銳十策卒降銳或請  
籍銳將拒戰者家貨以賞軍不可曰新定荆郢宜示  
寬大以慰其心由是江漢列城爭下以功檢校荊州  
刺史乃度嶺至桂州分道招慰得郡凡九十六授嶺  
南撫慰大使輔公祿據丹陽反靖擊擒之帝大嘆賞  
突厥寇太原靖率勁卒三千破之定襄以靖爲定襄

涇陽縣志

卷之七

十二

道總管又進斬萬餘級俘男女十萬頡利亡去爲大  
同道總管擒以獻於是斥地自陰山北至大漠矣乃  
封靖代國公後進左光祿大夫增戶至五百遷尙書  
右僕射尋以足疾乞骸骨帝嘉之授檢校特進就第  
加賜靈壽杖已而吐谷渾寇邊起爲行軍大總管深  
入殘其國國人多降吐谷渾自經處靖更立大寧王  
慕容順而還改衛國公病甚帝幸其第流涕曰公朕  
故人於國有勞今疾若此爲公憂之薨年七十九謚  
景武所著有李衛公問荅

有傳見  
藝文



李道裕大亮兄子也貞觀末爲將作匠有告張亮反者詔百官議皆言亮當誅獨道裕謂反形未具帝怒不暇省斬之歲餘刑部侍郎缺宰相屢擬名進不可曰朕得其人矣往者李道裕議張亮獄朕雖不從至今悔之遂用道裕後終大理卿

李迥秀字茂之大亮族孫也及進士第又中英才傑出科調相州叅軍累轉攷功員外郎武后愛其才遷鳳閣舍人大足初檢校夏官侍郎仍領選銓汰文武號稱職進同鳳閣鸞臺平章事張易之兄弟貴驕因

捷意諧媚士論頓減俄貶廬州刺史再貶衡州長史中宗卽位召授將作少監累遷鴻臚卿修文館學士出朔方道行軍大總管還拜兵部尙書卒迥秀少聰悟多通賓客喜飲酒雖多不亂當時稱其風流毋少賤妻嘗詈媵婢毋聞不樂迥秀卽出妻曰娶婦要欲事姑苟違顏色何可留後所居堂產芝草犬乳隣貓中宗以爲孝感旌大門閭

龐堅玉四世孫安祿山反南陽節度使曾旻表堅爲長史兼防禦副使與潁川太守薛愿共守潁川時陳



雷榮陽已陷賊南陽被圍而潁川當往來劇賊無阿  
史那承慶悉銳攻之傳城百里樹木皆剝城中士軍  
寡糧少而堅與原晝夜戰諸郡兵無援者自正月盡  
十一月賊設木鵝衝車飛梯薄城矢如雨士皆雷譟  
夜半踰城入二人不肯降賊縛至東京將磔之有說  
祿山曰義士也彼爲其主殺之不祥乃縛於樹比死  
見者哭之祀鄉賢

第五琦字禹珪少以吏幹進頗能言強國富民術肅  
宗駐彭原琦謁見陳今之急在兵兵強弱在賦賦所  
涇陽縣志 卷之七 十四  
出以江淮爲淵帝悅拜監察御史勾當江淮租庸使  
兼諸道鹽鐵使鹽鐵名使自琦始當軍興隨事輒辦  
人不益賦而用以饒乾元二年進同平章事

宋

第五均倫之後徙居三水縣歷戶部尚書爲人倜儻  
有威儀博通書史興學崇儒

元

趙弼字元輔其先澤州晉城人父得賢憲宗時爲豐  
州軍民總管以征蜀過京兆雲陽因畱家焉弼十一



歲而父卒會世祖平雲南歸駐平涼弼母携弼往見世祖哀而受之視遇甚優後嘗授事出使西盡巴蜀北窮磧漠歸必問其所塗兵民官吏年穀狀以誌者能而資其遠覽也久之當國者諷求阿已弼曰吾日侍禁中可交柄臣冀進取已而官朝列大夫爲郎符寶局賜玉帶歷僉書樞密院事尋遷嘉議同知大都留守兼少府監京師世家望族爲之歛迹丞相桑葛覲取玉帶新日賜物非有追詔不可授人後官資政以使出宣慰荆湖北道時西蜀諸彝貢琛率舟達江涇陽縣志



府監贈柱國順國文簡公獻翼奉議大夫奉元路耀  
州知州獻能獻功武畧將軍雲南守鎮萬戶

寇下有勇力當元初兵亂家族散失卞遯處峩山流  
民謀可以保生者共推卞爲義軍元帥能得衆心壬  
辰會又饑八月掘地得宿藏麥數十車衆欲食之卞  
與安撫馮公魏公議曰若畱以爲種待來年然後食  
乃長久之計也衆爭之不聽遂莠於峩山前明年麥  
果大熟得數年之儲衆喜曰非公遠慮我等爲餓殍  
矣及歸元行省田侯見而奇之以帥職調雲陽尹卞  
涇陽縣志

卷之七

十六

以道化民至元甲子判耀州加敦武校尉後調高陵  
尹已又調醴泉所至有聲

趙伯祿忠顯校尉管軍把總子惟明鎮國上將軍雲  
陽等處宣慰使佩黃金虎符次子惟貞忠翊校尉蒙  
古軍萬戶府鎮撫佩黃金虎符舊志俱未詳其行事  
張仲仕至耀州知州舊志未詳其行事

楊欽三歷風憲俱有聲

王昇善號純齋屢居憲職每出使能宣上德達下情  
天曆間上召而問其歷仕之由曰爾當持晚節侍御



西臺命大學士虞集書其堂曰晚節堂昇善旣領臺  
治西歸益勵意激揚尋除甘肅等處行省叅政以老  
辭詔半俸終身

王惟貞昇善子以父廕除冀州判官政平訟理有父風  
後進奉訓大夫邠州尹

寔僧奉訓大夫陝西諸道行御史臺監察御史沉鷲  
簡默足以屏姦邪回澆風也

王博文以舉人任寧州判官舊志未詳其行事

潘希賢字悅道任陝西西道乾州永壽縣團尉有惠

涇陽縣志

卷之七

政及人聲著一時

楊勝以進士歷四川宣慰有平苗勲見明興兵起解  
官歸訓家有條足淑來裔厚遇鄉黨人多德之

明

呂鏞洪武初貢士歷任知州品行爲一時冠冕

朱師勝洪武初歷任知州卓有政聲

李昶字文曄洪武中貢入太學以學行積著授左府  
都事有能聲永樂間累官刑部右侍郎時靖難之後  
民甚彫弊行部又初置多事昶施設咸得其宜尋大



營建諸所需用益稱繁劇昶應之裕如後轉戶部扈  
從北征轉餉數千里未嘗乏絕宣德初陞戶部尙書  
卒昶慈祥謹飭已有過聞言卽改於人之過從容論  
之雖奴隸不輕施刑所得俸及諸恩賜皆分散姻族  
卒之日家無餘資祀鄉賢

張翥洪武中貢士授詹事府主簿陞御史巡按山西  
言山西行都司地方切近沙漠軍人犯徒流罪者止  
從法科斷仍畱原衛戍守從之歷任副使叅議俱遇  
事敢爲尤以清謹著稱

吳徵洪武中貢士歷任戶部員外郎樸實勤敏綽有  
令譽

郭肫字彥仁洪武中貢士歷任漳州府通判始終清  
謹漳人以詩送之有一段漳江徹底清之句爲立祠  
祀焉

馮貫字道一生有美質以吏授通政司知事歷右叅  
議會邊寇起給餉有功陞右通政已轉左每引奏音  
吐容止足壯朝儀才識練達時譽歸焉子瑄成化間  
貢士



李博文正統壬戌進士歷任陝西按察司僉事能持  
憲體一路肅清

李儒正統間貢士授鄒平縣知縣有貴戚占奪民田  
官不能制儒奏聞歸田於民民詣闕請建祠祀之陞  
冀州知州州故有水患儒築堤四十餘里患息民亦  
爲之立祠及歸清苦如寒士焉祀鄉賢

翟弁正統辛酉舉人授寧陽縣知縣端謹慈祥民宜  
之時論謂不負科名云

趙謐字子安號貞齋景泰辛未進士授戶部主事歷  
涇陽縣志

卷之七

十九

陞江西布政司左叅議廉介不阿勇敢有爲所在以  
能稱至持母喪廬居墓次強暴者不忍犯事聞旌表  
有墓碣  
見藝文

王瑾字仲玉景泰丙子舉人授安平縣知縣獄有妖  
道號草上飛誣平民與同盜瑾廉得其情弗詰人咸  
感服縣治北有沙岡數十里夏月行人多中暑死瑾  
植柳萬餘株每三百株構一草屋穿井其旁募工守  
溉踰年柳成陰行者便之比於召棠之蔭焉陞漳德  
府通判



王政成化乙酉舉人授固安州訓導有勤能譽歷陞涿州知州

李錦字尙綱號谷口成化丙戌進士任御史雅著風力以清獄爲忌者所中罷歸纂輯邑志倡修渠堰鄉人重之

有墓表  
見藝文

趙蘭成化壬辰進士歷任兗州府知府謹飭和藹善於其職

陳梁字伯棟成化癸卯舉人任渾源州知州地有恒山素禁採樵梁奏弛禁民獲利南人克大同軍役水

涇陽縣志

卷之七

二十

土不服多死者梁上其狀各調本土衛所陞贛州府同知時有巨賊數萬掠郡縣梁奉檄往討以計誘執百餘人又遣人分諭諸賊使解散賊黨遂平城南漳江難徒涉梁作石橋人便之稱陳公橋

張官字惟賢弘治己酉舉人歷任雲南府知府先是守此郡者多爲土官所蠱死張官至土官高鳳獨敬信之曰未見仁厚如張公者又土蠻故常相構殺先守者不能治張官爲平之蓋坦易篤實能感化人者云弟張守字惟約弘治乙卯舉人授封丘縣知縣時



叛寇劉六所至陷郡邑獨封丘能禦之不陷陞永平府同知有以民田獻爲勲臣庄者守繩以法陞成都府知府卒於任人謂張官才不及弟而德過之有識者以爲確論

張憲字廷式弘治壬子舉人初授絳州學正陞登封縣知縣有霸州巨賊數萬攻城憲招撫被擄男婦百餘人斬賊首五十餘級陞順天府通判疏浚河淤以通漕運卒於官

穆世傑正德辛未進士授樂安縣知縣時有紅巾賊涇陽縣志

卷之七

二十一

爲亂世傑躬擐甲胄率兵討之殲其渠首餘黨降邑賴以安隣民爭歸附焉以艱回籍孝行尤甚著聞

趙彥之字士美正德丙子舉人初知撫寧縣一意節愛寧薄厨饌以忤所過權貴不剥下百姓歸心焉又築復塞外星星域名益重徵授南廣東道監察御史巡江羣盜憚而他之聲振南臺中會病補睢陳道兵備僉事居無何引疾致仕

秦世顯字子修十歲能屬文十八登嘉靖癸未進士授饒陽縣知縣饒陽地瘠訟繁多盜而世顯幼又癯



弱人患難治及至每日高視事裁決如流食頃庭無人焉火之囹圄空日益閒靜惟率諸壯士射侯而已會盜入境乃射獲渠魁餘下馬受禽自是境內無盜尋以才調襄垣年二十三卒時共惜之

韋文英字德華嘉靖戊子舉人居官廉能有執陽城時有大豪兩人者故專凌轢其官稍不如意則訟陷罷之文英捕案伏法相繼虎境內肅然久之陽城大治名擅晉中陞永平府通判歸無餘資田廬未嘗增拓也

涇陽縣志

卷之七

二十二

韓思靖字希安號對涇嘉靖戊子舉人初授工部司務歷戶部員外郎郎中陞鹽運司運同渾厚愿慤立官雖無赫赫聲而人多信焉孫子廉嘉靖甲子舉人有墓碑  
見藝文

韓廷學字復性嘉靖辛卯舉人任辰州府通判憂歸行李蕭然補青州謹飭如故陞忻州知州左調渾源州罷功名稍稍損矣而清節則足重云

呂應祥字子和號龍山嘉靖壬辰進士授行人出使秦韓肅慶諸府悉却餽遺考選吏科給事會京師地



震上書言五事已監草場發司場太監減芻奸狀覈  
宣大邊釐得登耗出入之實劾都御史以下若干人  
條塞下便宜十事皆嘉納焉上幸承天耐皇太后顯  
陵應祥以禮科都給事中從議禮多所匡正會選官  
僚以賄行應祥抗疏論之遂罷歸每徒步市井中仍  
如未遇時蓋誠樸和易出自天性云子潛嘉靖丙午

舉人

有墓誌  
見藝文

陳叔願嘉靖壬辰進士初授戶部主事輒有才譽久  
之尙書者憤部事漸弛東南多逋稅上請遣叔願往

涇陽縣志

卷之七

二十三

督之叔願直法行不避權右稅乃完時戶部郎不得  
轉京堂官尙書曰若陳郎中可不京轉耶於是陞光  
祿少卿未幾以失助祭左遷已遂罷時論絀之

張雲鸞字子禎嘉靖甲午舉人總角時文大驚人一  
出遂有奇譽然性沉篤不爲世俗周容能知東平州  
時有夜殺其薛寡婦家三人者賊不得雲鸞謁款城  
隍神夢得其賊姓名捕案輒伏法後知霸州陞蘇州  
府同知益顯名諸郡中部使者交章薦以爲可大受  
而一病死矣惜夫



強書嘉靖丁酉舉人授潞安府推官折獄如流陞蔚  
州知州事益敏案無滯牘陞永寧府同知遂乞致仕  
歸

張汝棟嘉靖戊戌進士俊爽通方所至人輒譽之任  
南給事中劾罷有與援兵部尙書已在寧起而上書  
言時事疏入語意波及都御史並大理卿皆罷之於  
是省中爲之增氣中外士紳無不稱數張給事者會  
病卒惜未究其所施

龐俊嘉靖丁未進士爲御史以端謹稱歸里不請託  
涇陽縣志

卷之七

二十四

不聲伎尤習俗所難

以上係魏恭襄舊志有爲恭襄所稱許而志中未  
列者今並補之字句間有增刪然不失其本義

呂潛字時見嘉靖丙午舉人幼初讀書於父龍山公  
所指授卽解大義稍長師事呂涇野以道德之儒自  
任嘗書克己銘懷袖警心言動率以涇野爲法曰吾  
寧媿吾父吾師乎自號媿軒時詔有司推擇孝廉中  
行誼端方者特擢以風士習撫按交章以潛名上授  
國子學正尋陞司務而大司成大司空皆引重之監



中矜節行重名誼橋門爲之丕變一時馬文莊爲  
酒郭蒙泉爲助教海內謂關西有人大復涇野先生  
之舊云郭郭與潛同里閉雖知名稍後而文行相等  
至今稱之日呂郭祀鄉賢

有墓誌  
見藝文

王之弼字右軒嘉靖壬子舉人初授蠡縣教諭陞文  
安縣知縣執法除奸盜賊衰息時有僧密藏婦女廉  
知置之法並毀其寺一邑風化肅清陞琢州知州邑  
民請以州銜畱原任擢永平道兵備僉事歷陞薊州  
道兵備副使二品服俸以艱歸卒年七旬有八子曰  
涇陽縣志

卷之七

二十五

俞萬曆間貢士孫服昂順治間貢士

魏學會字惟貫號確庵嘉靖癸丑進士授戶部主事  
歷員外郎郎中有權璫欲爲商人冒支芻餉鉅萬大  
司農許之學會執弗與督餉宣府適敵騎薄城守者  
不知所出學會遽攝戎衣乘城指授方畧敵遁去擢  
光祿寺少卿尋拜都察院右僉都御史巡撫遼東遼  
有叛卒黃勇者朝廷懸重賞購之不能得學會故不  
問或以爲言則曰勇本吾人向處置失宜故外逋耳  
我且撫而用之何購爲勇聞以爲信然借數卒入城



乃執之甕城中因晉俸兩級無何晉右副都御史巡撫如故尋以疾告起爲兵部右侍郎改吏部轉左時新鄭高公以閣臣攝部事閣務繁劇部事一切倚重之學會歷年格杜請謁每事皆稱善神宗卽位江陵新鄭不協新鄭策免廷臣失色公獨大言曰上踐祚甫數日首逐一顧命大臣草詔出何人手不可不明示百官衆爲凜然以此失江陵歡方晉南都察院右都御史隨有列白簡者詔褫新命以待郎歸江陵敗乃起爲戶部侍郎未任改右都御史督倉場尋陞南

戶部尙書再疏乞骸骨謝政會敵擾西北有詔簡大帥廷議以學會名上起兵部尙書兼都察院右副都御史總督陝西三邊軍務學會抵固原敵擁衆數萬奄至三戰三北之俘馘不可勝計上嘉其勛晉太子少保廕一子世襲錦衣千戶賜金綺有加邊事方以次舉而寧夏哮拜父子殺撫道據城以叛學會謂賊已負嵎顯言攻之彼守益堅恐未可旦夕取也乃發檄僞撫以緩之潛檄各鎮徵兵餉自統大軍駐靈州以偏師駐花馬鳴沙諸要害使不得渡河窺關又分



兵收服四十七城堡以孤賊勢兵餉四集則進師薄城下圍之賊裊將哮雲中箭死賊氣以奪而城堅不可拔計惟決水可灌灌城恐傷士民且促之從賊不便乃築堤障水圍城將圯城中懼且譟學會曰此可以行間矣乃射書城中疑之使自相圖居民亦多受計爲內應未幾哮氏果與其黨自相殺門啟師入哮氏閤室自焚死寧夏以平先是言官急欲攻城有議學會逗遛詔逮問學會既行而城破縉紳上書白冤章滿公車學會終不一言自明而上感悟還學會官

歸里嘗著四禮儀式爲鄉人祭酒每事爲綿蕞以行及居父母喪先後六載不酒肉不足涉中門族黨鄉鄰之貧者捐資賑之而自處甚約所學以誠信不欺爲主文宗司馬子長書宗晉俱得其逸趣著涇陽志遼陽奏議詩文若干卷卒謚恭襄祀府縣鄉賢子知觀萬曆間貢士

張守道字希賢村居涇河之濱自號涇曾子嘉靖癸丑進士授戶部主事監督通倉倉蓋禁故嚴諸倉卒懷粒米升許輒抵罪守道每寬之曰貧不徹骨必不



至攘此升斗粟爲也且此遽能損積貯哉迨去倉人  
畱其烏以寄思焉歷陞山西按察司僉事和易如故  
守道初貧旣舉於鄉猶於宴携珍品以歸獻父母並  
遺諸弟後思父母之不及祿養也每悲楚不欲生所  
獲俸資盡與兩弟共之

李世達字子成號廓庵嘉靖丙辰進士授戶部主事  
調吏部著有聲望巡撫山東膠河議起世達身親籌  
畫勿以大役累民總督漕河以寶應湖險歲多漂沒  
請開越河以殺水勢爲百世利晉南太宰大察汰遣

數百人無不心服入爲大司寇上以邊臣僞增首功  
怒欲附重辟世達知其人可用卒出之權璫勢張世  
達疏請革禁近供事已爲都御史斥韓介輩五六人  
臺中肅然改觀又申明憲典巡撫無得以問餽相遺  
所薦屬下吏無得執贄及門違者論如法一時苞苴  
斃絕卒謚敏肅賜諭祭葬入鄉賢

有傳見  
藝文

郭鄂號蒙泉嘉靖戊午舉人生而端凝從學於呂都  
諫公應祥已乃與都諫子司務公潛日相研究其學  
大抵宗程朱而要之主敬嘗有詩云學道全憑敬作



箴須臾離却道難尋嘗從獨木橋邊過惟願無忘此  
際心可以驗其所存矣及舉於鄉潛業先郭舉名大  
震三輔聞學者因郭學同行同稱曰呂郭以薦授國  
子監助教監規一遵呂文簡公之舊時都察院掌院  
事某公服郭高節欲致臺中而故事御史無得過五  
十是時郭五十餘矣掌院者移書郭使毋自實年書  
後以一過示意脂粉從來不誤身淡粧空自老青春  
試看今日承恩者盡是東塗西抹人郭不從書後亦  
荅以一絕任他竹葉引羊車獨閉深宮度歲華挨得

頭顱白似雪忍將脂粉媚官家掌院者愈重之尋陞  
戶部主事遷員外郎郎中權稅臨清有美金若干悉  
輸於官無何出爲馬湖府知府馬湖戎漢禱處號爲  
難治郭撫以至誠皆悅服撫按交薦方期大用而郭  
以致仕告咸訝之郭曰祖制外官六十引年職年及  
敢濶仕路乎撫按知不可強乃許之歸是時次子九  
有成進士爲翁氏令迎郭祿養及卒九有扶襯歸學  
者私謚曰貞懿先生祀鄉賢

胡嘉謨號心吾嘉靖壬戌進士生平言笑不苟人不



敢干以私爲吏部杜絕請託銓政一清歷刑部戶部  
侍郎皆有執持陞南掌院卒於道祀鄉賢子璉萬曆  
丙子舉人

維遵字道行號涇坡嘉靖乙丑進士授戶部主事歷  
吏科都給事中劾權璫馮保奸忤江陵謫浙江照磨  
陞太原府推官歷尙寶司丞時江陵遇父喪不請寧  
請歸葬令尙寶司護送遵辭又忤之江陵死始陞太  
僕光祿卿尋陞右僉都御史巡撫四川詔採大木不  
擾民而速辦建武兵變遵戡定之多所生全因論掌

涇陽縣志

卷之七

三十

院都御史解任歸子于仁萬曆癸未進士

有墓誌  
見藝文

趙應元字仁齋嘉靖乙丑進士初授華陽縣知縣丁  
艱補郊縣行取御史巡按湖廣遠江陵歸葬冠蓋踰  
境會者如雲應元獨不赴卽日掛冠歸里直聲動天  
下後起原職陞南大理寺右寺丞卒於官祀鄉賢

趙應龍字時化號挹山嘉靖乙丑進士授伊陽縣知  
縣伊賦輕重不均應龍以九等定民賦賦乃平居九  
月調臨淮會有尸浮淮水不行應龍密廉得三人携  
一婦同舟者收鞠之則婦殺其夫而投諸水中者也



論殺此三人時以爲神政治治赫然江淮間行取湖廣道監察御史按屯牧事減騶從薄供億條奏凡數上皆關治理之大者惜未竟其用卒子弘訓嘉靖辛酉同科舉人孫虞佐萬曆丙午舉人河南按察司副使兵備汝州道居官有廉操先任揚州府同知民稱爲趙不要云

劉四科字健巷隆慶辛未進士授長治縣知縣晉俗以丁坐役多欺售四科廉其奸狀貧富稱平陞吏部主事尋陞考功郎時尙綜覈四科曰彈文多溢語吾

寧從寬令有改過時至政府有循次當陞吏科都給事者以其人曾爲政府幕置之冢宰缺政府注意有人科正色曰某優於館閣知人非其任也竟不從轉太常卿養病家居起太僕卿或言牧馬地稅可歲得二萬金四科三具疏止之璫黨以抗阻訐上卒從科議晉都察院右副都御史撫薊鎮時畿輔水災請上發帑金數萬賑濟考滿晉兵部尙書巡撫如故卒於官贈太子少保賜諭祭葬入鄉賢子宇曜萬曆庚戌



張鑑字孔昭號湛川隆慶間恩貢初授趙城縣知縣補遷安陞太原府同知督餉偏頭關勤能有聲加河東運司歷官二十年布衣蔬食如寒士私謚貞惠祀鄉賢子炳璿崇禎間貢士

韓希仁字孟元號心堂萬曆癸酉舉人授高密縣知縣密地薄不稼稽希仁給牛種勸墾三年積倉穀三萬餘石荒歲民賴以生陞潁州知州平康中有陰殺其游閒子弟者具首子弟殺娼自刎希仁廉得之日卽首殺者殺之也爲搜獲二血衣竟抵死潁民咸服

其神丁艱補濱州濱之巨盜匿爲院司兵快或首之希仁佯叱日安有公役而爲盜者乎故毀其狀密報院司請付法無有逸者賊黨遂絕陞襄陽府同知清軍伍稽尺籍覈虛糧積弊一清而督修老龍堤以捍水患尤屹然爲江漢保障焉以疾卒於官祀鄉賢曾孫望順治壬辰進士

張九叙字伯韶號和庭萬曆丙子舉人初授翼城縣教諭陞藁城縣知縣澤沱汜濫城舍幾淹九叙相機疏濬民獲安全陞順天府通判後以註誤謫判澧州



卒祀鄉賢

宗思字虎坪萬曆間歲貢賢豪自負性直不阿授出  
西澤州學正時鹽院謁文廟以雨將拜於堂上思抗  
聲曰拜下禮也鹽院悚然卒復其位每月課士捐俸  
修先師之宮陞肅府教授王師事之子有功萬曆壬  
午舉人

許守思字誠齋萬曆庚辰進士授鄒縣知縣鄒土瘠  
民貧守思招墾荒地數百頃教民織紡鄒知製布自  
思始以治行第一行取河南道監察御史連疏建元

涇陽縣志

卷之七

三十三

良正宮體一時直聲動海內有宦者驕橫不法守思  
憤甚振臂毆之諸閹奪氣無何出爲河南驛傳兵備  
茂州尋移霸州兼攝天津益振刷無所畏避有撓法  
者卽權貴不少貸以事觸宸怒逮杖下獄上識其  
名曰許大漢守思形長大故云久之有直守思者交  
章申救得釋歸田里卒祀鄉賢

武紹祖字克光號傲愚萬曆壬午舉人初授濟寧州  
學正歷陞工部四川司郎中有兩中涓爭筦織造者  
疏下法司或稱東朝秘旨以屬紹祖兩罷之而別擇



良者以報時服其斷陞四川保寧府知府三巴故產  
茶而茶有樣有芽以爲民患紹祖悉蠲去鹽課故權  
井井有枯有實有鬻按井而權無得免者而新井以  
供他費實充橐耳紹祖於凡應免者盡罷之獨以新  
井應權陞兩淮鹽運使卒祀鄉賢子懷崇禎癸未進  
士怡順治辛卯舉人

牛應元字兆坤號春宇萬曆癸未進士應元幼穎悟  
師事魏恭襄侍立終日不倦闡明道學一以朱程爲  
宗授光山縣知縣光歲貢葛爲民累應元募匠自織

涇陽縣志

卷之七

三十四

解光人賴之建義倉積穀六千八百石有奇以備緩  
急其地產麟應元不以爲瑞有中使過揭圖以進上  
責之部使者應元曰國家以民和年豐爲瑞麟而瑞  
諛也小臣處不敢諛上是之尋行取四川道監察御  
史按鹺兩浙力剔奸竇鹽政一清巡方應天時植權  
璫開礦蹂躪富室應元捕其黨繩之法擢大理丞陞  
少卿適有楚宗人訐王非嫡派應元力請勘當輔右  
王應元執益堅復有妄男子匿名言事動搖國本上  
震怒當軸欲假此中所訐忌金吾以疑捕皦生光生光



廷鞫自承然終不言主使名應元當獻决指頭上日  
天鑒在茲斷不敢波及無辜但坐生光其保全善類  
不傷國體有如此晉中丞巡撫南贛飭武備核將領  
拔才能禁苞苴暇則爲諸生立社質疑問難諸生不  
復知開府之尊以予告去去之日積橋稅羨金封庫  
充國用里居十餘年撫按交薦復拜南大理寺正卿  
尋擢北刑部右侍郎歷左侍郎三乞骸骨歸杜門著  
書爲理學名臣於恭襄無忝焉所著有四書質言會  
真錄侍御疏稿卒贈刑部尙書賜諭祭葬入正學書

涇陽縣志

卷之七

三十五

院府縣鄉賢

有墓誌  
見藝文

張問達字誠宇萬曆癸未進士初授濰縣知縣擢禮  
科給事中以星變劾妄言開采妄改漕河諸人又有  
定國本正學術糾高淮三疏尤關大體歷遷楚撫除  
採木惡璫之害徵少司寇時張差闖宮問達曲體上  
意立斃杖下保全者多神宗大漸與顧命光宗又不  
豫問達與諸大臣候乾清門排闥哭臨擁熹宗出坐  
文華殿行叩慰禮呼萬歲內臣言須啟李娘娘知問  
達斥言上無聖母止知大行皇帝元子當繼體何知



有選侍乎與諸大臣更日內直隱禍始消陞吏部尙書以魏璫客氏亂政請告疏十三上乃歸歸而璫熾削問達職追賊問達日得與楊漣左光斗遊地下足矣崇禎時詔復其官贈左柱國太保賜諭祭葬入鄉賢

雒于仁字少經萬曆癸未進士初授肥鄉縣知縣調清豐陞大理寺評事時神宗不臨朝政于仁進四箴以直諫奉嚴旨放還布衣蔬食居之怡然也子獻書萬曆辛卯舉人

涇陽縣志

卷之七

三十六

劉三才字函一號易亭萬曆癸未進士授戶部主事監收通倉通故三倉請裁其一公私稱便歷陞四川布政司參議用法以嚴稅璫縱恣憚三才方正不敢犯遷山西按察司僉事時歲大饑三才以粟給餉粟價頓平軍民皆賴之以病告歸卒贈光祿寺少卿祀鄉賢

有墓表  
見藝文

劉可行字存所萬曆乙酉舉人取介端方魏恭襄公謂其才可比管樂署吳縣教諭時申相公旋里自撫按以下無不折節到門爲申毋壽教諭獨不往申高



其義愈重之陞潞城縣知縣歲大饑繪流離圖請上  
臺發倉粟二萬石賑濟民戴之如慈父母焉以疾卒  
於官會孫劉恂康熙丙午舉人

李忠臣號心葵萬曆乙酉舉人初授嘉祥縣教諭歷  
陞四川松潘道叅政赴任至永寧遇奢賊造逆忠臣  
卽於其地結兵三萬將圖討之會事洩賊携刃相迫  
北向拜仗劍自刎追贈中憲大夫祀鄉賢子延柯天  
啟丁卯舉人

張起鄂號薦梧萬曆辛卯舉人初授太原縣知縣陞  
涇陽縣志

卷之七

三十七

遵義府同知會奢苗變奉檄督師征之奢既敗遁而  
嘉定有重獄院司令起鄂往按其事將歸奢復亂水  
陸道絕起鄂借徑水西而水西又變土官安氏拘鄂  
三載水西平乃得脫朝廷嘉其不屈超擢兵備道四  
川布政使司左叅政以疾致仕歸子重光康熙間貢  
士

王從諫字蓋卿號抱一萬曆辛卯舉人授濱州學正  
時州有大獄爲民白寃酌以金却之不受陞鄆陵縣  
知縣丁艱補陽信值白蓮教興從諫推誠勸化妖黨



悉解去陞天津同知監督海運革盡陋規院委掣鹽  
從諫寧守清貧辭不赴事以疾卒於官子元士順治  
間貢士孫允纘順治戊子舉人

王豫立字定甫號玄洲萬曆乙未進士授稷山縣知  
縣稷遭賦累歲豫立用法平恕民化之輸恐後丁艱  
補蒿縣蒿環萬山中礦使開採奸徒蠹聚而任大宰  
兄弟稱渠豫立廉得其名大劊之蒿民稱快秋雨河  
溢城衝豫立劊長堤護之歲省版築之功以萬計陞  
南工部主事改北禮部儀制司時代藩以內嬖欲易

儲豫立持不許代藩故爲危語激上怒豫立曰祖宗  
之法立嫡與長上寧可以親親私代王乎力爭之疏  
入得報可陞右叅政備兵霸州州多大盜豫立設格  
勦捕三輔間里鼓不警會有以河墮地投獻巨璫者  
欲爲東宮庄田豫立啟東宮曰殿下將撫有四海而  
民間芟牧地左右欲私之爲利如殿下盛德何東宮  
出其人屬吏論死陞山西按察使轉陞河南右布政  
使分巡汝南道尋陞左布政使允所起解鄴邑吏手  
封識數多寡藩伯驗付藏吏而已遇給發按數予之



掾吏無得行其意者頃之晉南光祿寺卿旋移北值  
魏璫勢橫遂決意引退所知或勸行豫立笑曰君視  
此老梗頭皮能向闊人活耶乃以病請歸隱跡不交  
當事或以民間利病相質則剖析必得當乃已周急  
恤難鄉人咸德之居家十年而卒祀鄉賢子濤崇禎  
間貢士孫廉齋康熙丙午舉人

武文達字衷懿萬曆戊戌進士授鄆城縣知縣勤課  
耕織民利以興其聽訟先出溫語勸諭而徐以一言  
折之民胥悅服於儀門外構空舍以處訟者毋令費

涇陽縣志

卷之七

三十九

民財久之俗感化獄訟不興以能調滋陽歷陞寧前  
道引疾歸捐俸建宗祠春秋祭祀無缺積義倉穀數  
百石以周族中之貧不舉火并不能娶者所著有廣  
蒙求集

韓文煥號太素萬曆甲辰進士官翰林右諭德在史  
館二十年雅望爲世推重焉

郭鼎藩字翰于號斗衡萬曆丙午舉人授沔縣教諭  
時流寇率數萬薄城下縣令懼鼎藩泣勵義勇慨然  
以城守自任隻身入營以理論之寇圍解邑賴以安



後陞應州知州未任而卒所著有青箱別業洞庭記  
敵秋齋詩集子如儼順治己丑進士

韓繼思號正堂萬曆癸丑進士授翰林官至刑部尙  
書沉毅寡言歷仕四朝屹然山立以出耿汝杞獄削  
籍汝杞真定巡撫也初魏璫擅權京師建祠公卿皆  
往拜汝杞獨不往後以失軍機逮獄繼思惜其剛直  
犯主威而救之可謂忘身全善類者矣

楊國柱字叔堅號扶寰萬曆癸丑進士授泰興縣知  
縣泰興濱江之田坍漲無定其漲率入於豪右坍則

涇陽縣志

卷之七

四十

累貧民國柱以千畝爲一匹使不得混淆詭計畢出  
繇賦以平因著平賦錄以垂後泰人至今賴焉陞戶  
部主事犒遼羨金七萬悉還公家陞布政司左叅議  
兼按察司副使兵備河東時流賊犯隰州國柱整旅  
誓師檄游柳二將爲犄角而斬其不用命者軍聲大  
振禽勁賊混天龍等斬首千餘級賊乃遁歸里囊橐  
蕭然惟閉門著書而已及李賊陷陝國柱棄家避北  
山崇禎凶問至三日不食爲值哭之卒祀鄉賢

楊楠字毓秀號龍棟萬曆乙卯舉人授寧鄉縣知縣



時旱荒又流寇猖獗微檄無虛日楠處置得宜轉輸不匱晝夜守埤積勞成疾卒於官卒之日貧幾不能殮弟梧字鳳閣號念劬萬曆壬子舉人青州府同知攝府事有吏犯法暮按以金梧集衆痛治之會勦鄰寇察其脅從卽遣去多所全活以呈誤歸竭力兄喪撫兄子若已子友恭之萬時人比之元方季方焉楠子昌齡崇禎己卯舉人

韓琳字景圭號管涔萬曆丙辰進士初授淄川縣知縣調聊城俱多惠政歷陞戶部郎中時魏璫擅政置

涇陽縣志

卷之七

四十一

御史袁化中李應昇等於獄人畏禍不敢交一語琳獨入獄觀飲食涕泣終日化中等掩面囑曰願勿再來我等此鱗理固應爾先生毋自苦也陞湖廣辰沅道兵備右叅議辰沅瀕徃洞苗蠻叛服靡常琳嚴慈並用諸苗輸服未期年卒所著有武陵初草

許國翰號柱宇天啟壬戌進士授儀封縣知縣置義倉備賑督開支河節省河金三千八百兩有奇陞陞岳州道練水兵焚賊船洞庭積寇一清及爲充東兵河道倣用衛青武剛車威繼光鴛鴦牌之法戰守有



備其防河兵叅用鄉勇厚其賞給以故人有固志時  
寇賊劫掠而兗東宴然皆翰力也終易州兵備道山  
西提刑按察司

王徵字良甫號葵心天啟壬戌進士授廣平府推官  
會白蓮獄興株累無辜徵悉辯釋之開濬清河開演  
設八陣圖具有經濟起復揚州引導王駕無所擾魏  
闕構黃山獄事徵抗爭生全數百人及建魏祠徵不  
往拜以邊才陞山東按察司僉事監遼海軍務未閱  
月有登萊之變遂回籍值流寇充斥練習鄉勇畫策

涇陽縣志

卷之七

四十二

防禦歲祲出粟賑濟之闖賊陷關中檄召縉紳徵不  
應手題墓石付其子永春欲以一死謝吾主耳嗣聞  
京師失守遂七日不食死門人私謚曰端節先生所  
著有兩理畧奇器圖了心丹百字解學庸解天問辭  
士約兵約元真人傳歷代發蒙辨道說山居咏諸書  
有墓誌與  
詩見藝文

都景運字永泰號著明天啟間恩貢授興濟縣知縣  
興濟多荒屯景運設法招墾調青縣修城禦寇築堤  
以利漕運陞河間府同知條陳截漕糧查海船清委



收稽招買効抵扣侃侃而言悉中利弊凡津門盤糧  
驗鹽諸陋規俱峻卻時天津歲饑出倉米數百石煮  
粥賑之以疾卒於官

張炳濬字義昭號虬庵崇禎間以貢士保舉授滿城  
縣知縣甫匝歲而撫綏有方邑稱大治清介不合於  
時遂罷歸杜門著書晚年尤工樂府有虬庵集二十  
卷子潮問崇禎間貢士重齡順治戊子舉人

皇清

唐通字達軒明崇禎間授榆林北林堡守備以功陞

涇陽縣志

卷之七

四十三

漢中府遊擊大同右衛叅將轉宣武團練副將密雲  
總兵守石峽時闖賊李自成犯京師通奉命以大將  
軍定西伯帥師討之俄京師失守自成至山海關遇  
清兵大敗竄回陝西通乃率部下千餘人取保德岢  
嵐諸州渡河據府谷自成恨通殺其長子使李過引  
十餘萬來攻通堅志誓師與賊數十戰殺傷甚衆會  
攝政王以書招之通獻保德岢嵐永寧葭州河曲興  
縣嵐縣林縣府谷九城封定西侯統兵會 英王擊  
李過於延安敗之進取西安自成南遁陝西以平



召至京以一等精奇尼哈哈番奉朝請卒子翰輔順  
治甲午舉人翰復翰弼翰乾翰宸俱以通廕任  
樊望字萬夫崇禎癸未進士順治初授衛輝府推官  
時郡有嘯聚者數千人望請於巡方單騎入賊巢開  
諭禍福賊泣而投戈焉未幾以疾歸

涇宦固多賢者然無事實可考不載於書恐迹類  
附會後人無徵也

隱逸

漢

涇陽縣志

卷之七

四十四

鄭樸字子貞褒中人西漢末見王氏漸爲亂階移家  
於雲陽谷口躬耕巖石之下名震京師大司馬王鳳  
以禮聘之不屈

韓幼孺漢哀平間多豪傑然莫足數其名聞州郡者  
韓幼孺有謙退之風

元

第五居仁字士安幼師蕭欒弱冠從同恕受學博通  
經史躬率子弟致力農畝而學徒滿門其宏度雅量  
能容人所不能容嘗行田間遇竊桑者居仁輒避之



鄉里高其義行率多化服遊其門者學明而行加修焉卒之日門人私謚曰靜安先生

程瑁字君用號悅古弱冠卽力於古學隱居不仕教授生徒嘗王盟三原縣學古書院遠近從學者甚衆所著有遼史異端辨雲陽志家誠詩集樂府文集諸書記鄉賢

王弘毅字子遠唐王珪之裔也總角通詩書善屬文宋末時詣京試賦大爲試者稱賞會元兵克汴家族離散乃避難習醫歸元管勾太醫院事已疾如神累

涇陽縣志

卷之七

四十五

賜錦衣繡帽金符弘毅乃厭聲利四十卽求退隱於谷口之文川結廬溪上怡志琴書壽七十五而終張全字之美讀書樂隱不喜俗交以山水文籍自娛邑人待之如公輔焉

明

韓巖字景高彰德安陽人爲父同官慶陽訓導張瑾婿瑾陞涇陽諭巖依之因家焉恬靜好學能楷書善於教人從遊者多所成就

趙璧字宗圓爲人樂易廉退隱居授徒隨人材質造



就之久而不倦焉

隱者必稱其德逸民之傳自古不少槩見也予故不敢輕錄皆採之舊志云

孝友

唐

曰伯明少孤伯母劉氏撫育及卒伯明負土封之廬墓側齋居菜食焉按唐孝友列傳云唐受命二百八十八年以孝弟通名朝廷者多閭巷刺草之民皆得書於史官如涇陽田伯明之孝友是也

涇陽縣志

卷之七

四十六

宋

張評事五世同居男女百口宋金兩朝勅築善門臺以旌之

明

駱森天順間貢士父病篤爲廢寢食親嘗父糞持喪廬墓泣血五年事聞旌表

張舉成化初以例授散官與二庶弟拆居二十餘年憫其貧出金千兩以濟之鄉人咸服焉

趙穉以吏任山西太安驛驛丞父卒廬墓哀毀三年



不少衰成化間事聞旌表

熊玻字瑩之弘治間貢士獲鹿縣知縣母歿廬居墓側三年且滿會父又歿卽續居之前後餘五年嘗有羣盜至知其爲玻也遺之布二事聞旌表卒祀鄉賢李完字秉全以吏任寧鄉縣典史母病膝完顰天時紙其目尋復明孫永年隆慶庚午舉人

潘拱宸嘉靖乙卯舉人巴州知州天性孝友家產靈芝因號芝庵人以爲和氣所致壽八十七而終

王薇垣生員父歿廬墓三年嘗夜有羣盜過廬所曰

涇陽縣志 卷之七

此孝子王公也相戒勿犯而去子道光萬曆乙酉舉人

王之垣字東菴萬曆間歲貢家貧授徒養母一日無以供母膳有狸奴啣金至母死廬墓哀泣棗悴復榮皆孝感所致孫豫立萬曆乙未進士

有詩傳  
見藝文

王一誠字明吾萬曆間歲貢保安縣教諭性至孝居喪三年不入寢室祭葬一遵文公家禮動履端方人皆稱以道學子昭嗣萬曆乙卯舉人

劉宇曜字叔定號象明萬曆庚戌進士生平能孝人



無間言登第後隨省親少保公四科任中少保公清  
介贖鍰數千金盡存庫及亡宇躍却之以成父志以  
扶櫬哀毀得疾而卒未展其才咸惋惜之祀鄉賢孫  
堯康熙己酉舉人

陳邦宦萬曆間息貢宜都縣知縣母故廬墓三年墾  
人稱爲純孝

張我狷儒士持父母喪足不入內室其弟張我翼崇  
禎庚午舉人授葉縣知縣寇圍城城陷死之人稱其  
忠孝並全焉

王世思少孤事母孝嘗於旅邸得遺金一囊乃嘆曰  
吾欲歸家養母而持他人之金以養非所以養吾母  
也且彼失金者寧獨爲無母之人哉待三日而失金  
者至舉其囊以還之母居樓樓忽災思自外歸登樓  
負母以出而鬚眉無損人以爲至孝所感云子自昇  
順治間貢士

樊茂天啟七年母疾思食鷄湯茂割股煎羹以進母  
遂愈知縣路公旌其門申請按院謝公給穀二石布  
二疋歲以爲例



趙九成字伯韶天啟丁卯舉人事父燕居侍立不問不敢對病奉湯藥旬日不解永年二十五而卒人咸

惜之

有傳見藝文

楊開泰生員居父母喪坐卧不離柩側崇禎八年寇至村人皆逃泰獨閉戶守靈知有親而不知有身也及葬每晨昏必至墓所拜跪而祝曰幽室安乎禱畢涕泣反袂拭面而歸如是者十餘年

武培極生員武嚴子崇禎九年流寇執培極及母索金不得欲殺其母培曰母死我奚存哉寇欲挾培去培又曰我去母奚倚哉寇怒其不從殺之終憐培孝而釋其母

皇清

張四明號見之順治丙子舉人祖母疾永夜不眠兄病籲天願以身代之三侄失怙撫養成立四世同居六十七歲始列鄉薦官古田其盛德之報歟

宗懌字仲愉生員家素貧養親必奉其旨兄弟三人同居不忍分析子棕順治辛丑進士

附考婦



明

楊氏生員秦甲禮妻生員楊榜女割股療母督學旌之

呂氏生員韓鍾秀妻姑劉氏疾危烹股肉以救知縣路公旌其門

孝友爲德行所重前宦業隱逸中已數數見之茲專紀其實使知崇本也而爲人子婦無異爲人子例得並書

義俠

涇陽縣志

卷之七

五十

明

趙敬以例授散官歲旱出粟數百石賑濟見暴骨輒擇地葬之人有疾施之以藥孫勉永樂甲午舉人元成化丙午舉人

曹儼弟恪正統間值歲凶各出粟千石賑濟奉勅旌表

張敏富好施予嘗出粟千石助賑奉勅旌表

蹇賢弘治甲子舉人容城縣知縣少時授徒王好善家有隣女叩門求苟合拒之不納次晨以他故辭主



人去宦歸避暑別室隣人潛至其家盜取八百金僕  
欲舉首賢不可曰貧富數也我今日比做秀才何如  
首之官恐傷姓名賊伐渠樹百餘株被獲隨釋去念  
賊今午定不能舉火不然何不黑夜竊取而白晝如  
此乎并以其樹遺之歲旱讓水同畔以濟窮民有越  
水程者心甚恐賢婉言慰之且令其再使無妨也父  
死不離墓媳瞽不易親行誼俱不可及

馬瑄字允莊弘治間以監生授吳江縣縣丞嘗郊行  
得遺金坐以待頃一人號泣至爲言賣女得此養老

涇陽縣志

卷之七

五十一

毋卽與之復周以粟所著有五經正義四書中說性  
理發微通鑑管見諸書

姚玉璽字信宇萬曆乙卯武舉甘州右營遊擊親故  
不能葬者捐貲買棺卜地歲饑出粟賑濟鄉隣被德  
焉

趙思齊字心印萬曆戊午舉人有文武才善於六壬  
握奇時賊寇橫起練土者築鎮堡里人賴之崇禎庚  
辰歲大祲發粟賑濟多所全活子九成天啟丁卯舉  
人



王者佐字柱玉萬曆癸卯舉人涿州知州有閩人黃賓鄉被劫泣欲死佐憫之調以二百金又有韓霖負貸五百金因霖客死遠鄉竟焚其券壽八十餘而終張鳳苞字美寰以例授鴻臚寺序班家素封散財賑饑里黨皆頌其德壽七十而終

劉永安出粟助賑給冠帶僉事王公表其墓

邢大信字順甫號太乙萬曆間歲貢莊浪衛教授性好施每遇鄉鄰有貧者捐貲濟之年九十二作遊仙詩云青鳥倏而至慇懃前致辭歸來太乙子桃熟已涇陽縣志

卷之七

五十二

多時無疾而終德報洵不爽云所著有考古編力學集詩賦論傳序銘諸書子祥順治丙戌舉人巢帝閣生員道拾遺金五十兩坐待一日還原主及暮歸路臨高崖所乘驢忽驚走里許而崖遂崩人以爲陰騭之報也子于科順治辛卯舉人

任紹曾字子述監生天啟間歲饑輸百金賑濟有貧不能償貸者每焚其券家業以是中落子璣順治辛丑進士

陳繼泰字憲宇崇禎癸酉舉人都察院司務慷慨慕



義少年多遠畧崇禎己巳賊亂破產糾義旅數出奇  
勝之賊始遁去閭里恃以安堵有詩見  
藝文

李亨勇敢多力崇禎己巳憤賊亂自請從軍所殺傷  
甚衆值羣卒潰散獨奮身入賊營被害邑里爲感泣

焉有詩見  
藝文

秦光祖少習騎射崇禎己巳賊至仗劍從戎爲流矢  
所中猶力戰不已竟死於賊有詩見  
藝文

趙友梧字鳳喈崇禎間歲貢時羣盜蠢起友梧率雲  
陽鎮居民守堡練兵與賊戰屢多斬獲賊攻城五日

涇陽縣志

卷之七

五十三

不能下計詘夜遁後以奸人內應城陷死之

王祚丕字念茲生員崇禎甲戌流寇入境祚丕奮不  
顧身率衆鄉勇戰於王六十橋手刃數賊爲流矢所  
中而歿一時府縣督學共扁其門

王烈字丕承崇禎丁丑武進士商雒道中軍守備癸  
未歲逆闖入關烈守城禦敵相拒二十一日援兵不  
至城陷被執罵賊死之撫院賈公立碑旌獎

趙九筵賊至堡下衆皆懼筵鼓力捍禦賊屢登陴筵  
屢拒之身中矢死鄉人憫其義建祠祀焉



牛象燭字汝華生員賊至逼其下樓堅不肯屈樓焚  
蹈火死士人哀之

世風之不古也鄙吝者失其半柔脆者失其半好  
施禦亂斯人何可泯泯也昔魏恭襄彙入人物志  
未甚分別予特著義俠一科庶幾於廉頑立懦之  
義或有補耳

節烈

唐

李氏楊三安妻事舅姑以孝聞及舅姑與三安相繼

涇陽縣志

卷之七

五十四

歿也遺二子幼而家復貧窶李乃力田夜則織紡數  
年葬舅姑夫并夫之叔侄兄弟凡七喪唐太宗聞而  
異之賜帛二百段遣州縣存恤之所居後生芝草數  
十莖至明永樂朝采入孝順事實

金

王氏進士武師古妻師古疾且死與訣曰愚不幸命  
短汝年少當早圖他適後王氏誓人曰生爲武氏婦  
死卽武氏鬼也竟守節奉舅姑如初詔旌表其門

元



焦氏袁天佑妻至元間天佑從軍死其州焦年少宗族欲改嫁之哭曰袁氏不幸三世早寡皆守節義豈可至我遂廢我生爲袁氏婦死則葬袁氏土耳其衆不復敢言事聞旌表

二楊氏李家姑婦也姑之夫逸其名婦夫李廷蕙姑婦俱早寡相繼守節事聞旌表縣令名其所居街曰重節街

李氏符文進妻夫死時年二十六織紡撫育三子誓不再嫁至元中詔旌其門

涇陽縣志

卷之七

五十五

劉氏吳君錫妻未配而夫亡夫貽語許更事以圖衣食氏誓死守節甘貧織紡凡親鄰吉凶往還之禮杜門不出三歷饑饉草蔬木皮以度殘年終不失其所焉

周氏適張李氏適吳王氏適朱賈氏適蔡俱旌表王氏適馮則未旌表惜舊志未詳其夫名並行事明

張氏李秉妻年二十一而秉死子茂甫一歲守節不嫁育遺孤成立而舅姑亦得終養正統間旌表



李氏張福妻福死時李年二十三守節四十年以織  
紵嫁夫三妹撫孤子敬成立成化間旌表

甯氏劉釗妻釗早亡撫遺孤瑾以年勞授官成化間  
旌表

宗氏何瑚妻相夫業農泥濘歲大體瑚死有遺腹子將  
產氏曰吾今從夫於地下則吾死子亦死吾不死子  
生良人亦未死也及期而子生命其名曰憂生撫子  
成立壽七十一而終嘉靖間旌表

張氏劉和妻夫亡守節事姑以孝聞嘉靖間旌表

涇陽縣志

卷之七

五十六

祁氏王朝妻夫亡苦節以撫幼子歲儉家人私語曰  
糊口不給何守節爲氏痛泣以頭觸柱曰吾忍死稱  
未亡人爲王氏一塊肉耳令吾志不白者吾頭且與  
柱碎矣衆急救止左面青痕終身不變嘉靖間旌表  
白氏舉人張朗妻年二十二夫亡遺子雲凌方七月  
氏孝孀姑撫子成立嘉靖間有司表其門

閻氏周仁學妻年二十而夫亡親饋食於穿穴者語  
之曰穿必大其窟穿穴者應且笑謂少婦將欲從夫  
地下乎葬之先一日自經死遂同穴焉



劉氏張恩妻恩死劉痛哭不食積七日亦死事聞旌表

張四桂張倉女也倉早故四桂與母李氏居年十八爲對隣王宰所悅時以言挑之四桂心畏惡密以語母已而母之田間從外扃其戶宰知踰墻入強之四桂據其炕欄欄毀身終不移宰用錘斷其頭而去萬曆間崇祀烈女祠

馬驥妻趙氏趙圯妻韓氏張允妻王氏生員駱希顏妻王氏李雍妻趙氏任進孝妻王氏王洋妻趙氏師

涇陽縣志

卷之七

魁妻李氏俱獲旌表熊尙義妻張氏王瑚妻管氏陳官妻馮氏生員張崇妻秦氏李世開妻劉氏生員韓汝復妻王氏俱有司表其門徐威妻張氏兒婦淡氏孫婦鄭氏三世守節尤風化之美者惜未旌表以上舊志俱不詳其行事

王氏生員魏龍光妻年十九而夫亡痛不欲生繼死樞傍萬曆間有司以事上聞建坊入祠

王氏生員張紹祖妻年二十一夫病篤執其手欲有言氏知其意輒自誓不再適夫瞑恐舅始奪其志痛



哭不食七日而死萬曆間兩院旌獎入祠祀之

楊氏王元登妻年十九夫亡遺子可久歲餘有至戚勸以改嫁氏正色曰上有翁姑下有幼子仰事俯育吾責也爾何出此言其人赧然而退里中許御史守恩欽其貧而有德以女爲之媳焉氏壽八十二終於萬曆二十七年

魏氏生員杜易芳妻萬曆三十二年芳亡氏年二十七事孀姑教子生員恒新益初成立年五十七終

袁氏趙翼明妻萬曆三十四年夫亡氏年二十七苦

涇陽縣志

卷之七

五十八

節四十六年撫遺子之汴登順治戊子舉人司理王公表其門

晉氏進士劉宇曜妻適劉五載而夫故年二十絕食求死姑勸止之撫前氏子繼烈教養辛勤繼烈入庠以廕爲長蘆運副皆母力也孫堯康熙己酉舉人張氏儒士郭維藩妻萬曆間年十九而夫亡遺子京方一歲撫孤入庠壽逾八十而終知縣李公旌表孫茂恭順治己亥進士

白氏張大紳妻萬曆間夫故氏年二十有五遺孤嘉



歿方五歲家貧以紡績撫其子子復故又撫孫永思四十餘年以壽終

張氏生員劉源潔妻年二十而夫亡撫幼子丕基窮操蠶織娶媳魏氏丕基又早逝魏氏年十九生子文緯二歲魏氏屢欲死姑張氏諭慰之服闋有親戚勸其改嫁魏氏痛哭廢食者數日自以有疾當醫密置砒藥罍中將飲張氏覺卽舉罍碎之因泣日癡兒何至如是汝既有志其偕吾守節可矣姑婦共守四十餘年張壽六十餘魏壽七十餘道府旌其門曾孫儀涇陽縣志

卷之七

五十九

恕順治乙酉舉人

竹氏王可人妻可人年十九嬰疾二十九亡氏敬侍湯藥十年如一日夫故悲哀不少間迨歲終感念存歿遂絕飲食伯可大以子紀和年幼諭氏撫之氏泣日有伯在我死何憾頃之嘔血升餘而死孫華玉康熙丙午舉人

韓氏生員劉思向妻崇禎己巳向亡氏年二十四僅一女尙在襁抱苦節三十餘年而終

王氏劉從龍妻龍於崇禎壬申入蜀亡氏年二十有



九以紡績葬翁姑並翁之父母家貧無力執衽歛土以封墓門撫二子微衍成立苦節二十六年而終岳氏生員魏胤蕃妻夫亡無子年正少兄嫂逼令改遣氏剪髮明志者三其貧躬織以終餘年卒於明季順治間入祠祀之

魏氏生員樊彙妻年二十一夫被流賊所獲氏長跪乞夫生賊不許殺其夫氏輒投井救出誓不受汚而

處時崇禎丙子歲也事聞旌表康熙間入祠

與前張倉女張

氏魏龍光妻王氏張紹祖妻王氏魏胤蕃妻岳氏同登縣街節烈坊知縣路振飛聯云綠林任燭痛蘭摧涇陽縣志

卷之七

六十

清露嶺頭血字漬千秋重赤紅粉弱姿

悲玉碎差峩山下芳軀埋九地猶香

韓氏李惟蔚妻夫亡氏年十六苦節五十餘年而終知縣趙公旌之

羅氏陳國璋妻夫死男女無所出而家中落時翁且高年弟侄皆幼氏葬夫訖又葬翁家益落而節不改以終一時名人有詩表其節

高氏劉居仁妻氏字居仁未婚而居仁入蜀迎父久不歸母娶氏於家以待其子後蜀兵變父子俱死計聞母令改嫁氏守節誓不他適年七十而終



馮氏趙廷宋妻夫亡痛悼廢食者數日既而思曰夫雖死尙有遺腹幸而成男趙氏之不絕將在此乎因勉食而生子紹芳教之成立既而紹芳死又撫其孫師沐二十三而寡七十五而歿教諭譚公表其門

楊氏王彥學妻彥學病戒氏曰若性烈必爲我死老母二弱子將誰依乎未幾學故氏哭欲死姑以夫語諭之氏紡績佐蔬水督二子學能不負夫遺囑云

雷氏監生郭鳳翔妻鳳翔年二十病酒卒氏方十九流寇至其村標幟於門日勿犯節婦之家後賊又至

涇陽縣志

卷之七

六十一

居人率入節婦家避之苦節六十年而終督學李公表其門

周氏穆大照妻年二十五而夫亡止遺二女伯氏憐其無依令更適氏誓死不從號泣終日不食伯氏義之年六十餘而終

袁氏張體仁妻年十四歸仁甫三月仁貿易滇黔氏獨處十年仁旅死守節六十年卒鄉先達立碑以旌之

馮氏生員趙有節妻夫工右軍書氏每佐筆墨知大



義節亡氏方少艾哀痛枯一目苦節四十年教子炳然入庠

姚氏舉人何漢傑妻夫亡號泣欲死以兩子幼孱勉為視息苦節其貧日事績紡子稍長卽口授孝經以教之次子鵬翥康熙己酉舉人

王氏生員張用光妻夫亡氏年二十二並無子女苦節以終

吳氏王尙禮妻夫亡氏年二十五堅志守節撫幼子建極入庠年七十三而卒

涇陽縣志

卷之七

李氏陳國憲妻年二十六而夫亡事姑撫子苦節四十餘年

羅氏郭來輔妻崇禎己巳賊至懼辱匿崖洞間賊縱火焚之同匿者爭趨出氏獨赴火死有詩見藝文

姚氏曹登祿妻崇禎己巳義不從賊投崖而死有詩見藝文

馬氏王福盛妻崇禎己巳為賊所掠堅不失節投井

死有詩見藝文

楊氏竈一鵬妻崇禎己巳賊掠不從投井而死有詩見藝文

潘氏王進祿妻崇禎己巳賊至被擄見其色欲汚之



氏拔刀毀面自墮崖下死

詩見  
文

楊氏王三有妻崇禎乙亥秋月流寇掠氏大罵不從

賊怒斷兩臂及股割其腹右犬守其殘骸逾二日瘞

訖始去

韓氏師燮元妻寇掠不從罵死之

王氏生員康嗣昌妻崇禎乙亥秋被賊掠罵不絕口

賊怒殺之本縣旌其門

賈氏柴良卿妻崇禎乙亥秋流寇至良卿投井氏適

避他所賊去氏尋夫知不可救遂同死井中

涇陽縣志

卷之七

六十三

白氏牛象煜妻崇禎乙亥秋寇至被執誓不絕口賊

怒焚之

于氏楊方妻訓導于徵之女年十九歸寧而賊奄至

強之行氏攀樹大罵賊怒殺之割其耳以去

趙氏梁爾翰妻聞賊近自縊督學旌其門

陳氏王三統妻流寇至氏投井中賊去鄰人引出賊

又至復投井死

何氏監生王運昌妻年二十流寇令氏入厨爲具氏

知不免以厨中刀自刎



張氏韓爾訥妻賊攻堡陷氏避居高樓賊焚樓氏有子方襁裸跪乳母曰吾家僅有此子爲韓氏一線之脉好爲撫之語畢墜樓而死

任氏任盡禮女年及笄寇至掠之以行女陽爲從行見一井投之賊奴下石遂死井中

李氏焦希商妻賊臨堡城自縊死有扁旌其門

何氏父承怡年及笄未字流寇至隨母避窟中賊焚窟搜獲母子俱不從賊怒並殺之

李氏張佐妻流寇一喜其少而有姿與一扇氏佯受之

涇陽縣志

卷之七

六十四

給至井傍賊覺水於井上忽有傳賊語者賊起應氏卽投井死

楊氏李魁吾妻流賊突至迫其行氏不從賊牽髮以行比見賊魁初以其言令縫緝又不從賊怒及之

茹氏生員韓羅妻年十六流寇見而悅之令乘馬氏張目大罵賊猶豫未忍殺傍一賊持刀斷其首

齊氏牛應麟妾寇至携子象煌避樓中賊攻樓不下焚之氏推子墜樓得生氏自焚死

屈氏周仕璉妻崇禎甲申賊掠馬上罵不輟口賊怒



殺之

王氏王養心女年及笄見寇劫掠投井死

呂氏王之臣妻賊強挾馬上由馬躍下者二賊怒其  
不從殺之

陳氏王三秀妻爲賊所獲大罵而死

婦以節烈見其所遭之不幸乎君子曰其處愈逆  
其心愈苦矣閨中懿行風化攸關苟能死生不失  
其正不妨多錄以示觀感豈日嚴以繩士夫而寬  
於論婦輩哉

涇陽縣志

卷之七

六十五

方技

明

王春陽學醫有解悟診脈用藥皆世醫意所不及

張碧山精於八法神針能起疲癯了凡表先生習術  
於其門

柴定向字少池善識風水能於數十里之外望地氣  
而知休咎嘗過學宮見育才坊廢請於縣令曰此坊  
復建必科第蔚興次年丙子果中鄉榜十人爲祿禰  
大學士王中伯公卜地其山峯峻拔占者以爲不利



向日此將軍山也當有以武成名者後果驗年九十  
七歲髮色如童遠近稱爲地仙云

徐青萍學琴於吳門其後遍遊天下名頗著焉  
梁時元善畫山水得沈石田筆意

游藝之事蓋難言之涇素多淹雅材惜舊志未載  
姑錄數人以見擅一技者亦足顯名當世也

### 仙釋

宋

張夢乾字天遊孟店鎮人家素封老而好道有脫塵

涇陽縣志

卷之七

六十六

離俗之志遇劉海蟾授以仙術遂賦詩曰這回脫穎

出塵寰雲水逍遙任自然寧作無爲閒白日肯教有

路走黃泉壺中深隱長春景物外潛藏不夜天真道

神仙難際會分明相遇復相捐一日辭村落人日遲

十日中午吾將飛去衆以爲狂及期登槐杪吐沫斗

餘猶舐之相隨狎舉涇陽商人卽於是日午見夢乾

於雲南片晷而騰躍萬里亦奇矣哉

利市先生白道玄峪口人以具貌古質厚肩背隆然

俗呼爲井轂轡生而七歲不能言及長馬丹陽遇於



途次與語若合宿契遂傳真訣蹈水如履平地日行千里脚下無跡嘗自歌曰橫順四條椽在世八十年若要跟尋我直至白骨邊後果八十無疾而卒既而舉葬棺空無尸旬日人見先生在白骨寺邊往來方驗在生所歌之言真神仙也

元

徐真人按雲陽志真人戒行精嚴祈禱有應勅賜清淨體道號靈真人

表思義按雲陽志太師明道德莊列等書兼通佛教涇陽縣志

卷之七

六十七

及醫術陰陽卜筮之學有著術道德經莊列等書引證馬丹陽孫也二洞講經賜紫金欄

隋

普安俗姓郭氏本縣人投謁法師通明三藏常業華嚴於子午虎林兩谷合澗之側鑿龕結庵有大石崩下安默念曰願移餘處莫碎龕窟石遂依言迸避餘所龕東有素庵者欲害安同伴三人發矢不離弦張目閉舌立經宿又龕西有張暉者夜空稱佛油負龕而出逃昏失性若有所縛不能動又龕南有張卿者



來盜安錢持去。祖中達家不得出口，噤無言。安各令懺悔，方解脫。皆孽嚴力也。程郭村程暉和恒來安所聽法，病癒。兩宿安至其村，喚之和，身遂動入其庭。大喚之和，卽偃起。安覆一筓，令以當佛座。令和達旋尋復如故。白村一母病卧百日，乞救於安安。至母卽下，迎言問起居。奄同常日，遂失病所在。龕側村中縛猪三頭，將烹宰。安聞往贖，索價不足。忽有小兒裹腹而至，助安贖猪。須臾不知所在。安卽引刀自割胠肉，曰：此彼俱肉耳。猪食糞穢，爾噉之。况人食米理足貴也。

涇陽縣志

卷之七

六十八

村人聞之，感動。一時有猪者皆釋放。

元

蘭公和尚，嫻儒經，有才力，巧於射藝。金元間大變賊，遍起。蘭公以射藝救人者衆，出雲陽志。

明

圓相俗姓牛氏，本縣東關人，號普濟遊巴蜀十餘年。聞關內大饑，期一見母，杖錫東歸。在邑之惠果寺，母雙目久失明，圓相晨昏懺悔，以舌舐之。一日自外歸，省以所著僧帽，卸持於手。母驚問曰：和尚遠來，頭汗



未消何遽脫帽耶圓相復着之以試母曰如此得之  
圓相欣躍如狂嘗置小車毋欲造親故卽獨拽以往  
事竣復載歸歲以爲常穿義井百餘改創天王地藏  
等殿

悟緣字萬休本縣人剃度江南爲雪浪門人後遊京  
師任圓通庵神廟間奉李太后懿旨護藏西歸開講  
文塔寺

仙釋近幻不敢濫及於舊志外僅續其一

涇陽縣志卷之七終

涇陽縣志

卷之七

六十九

